

JONES, DAVID RICHARD (1832 - 1916), bardd

Enw: David Richard Jones
Dyddiad geni: 1832
Dyddiad marw: 1916
Rhiant: Richard Jones
Rhyw: Gwryw
Galwedigaeth: bardd
Maes gweithgaredd: Barddoniaeth
Awdur: Robert (Bob) Owen

Ganwyd 24 Hydref 1832, yn Bryntirion, plwyf Dolwyddelan, Sir Gaernarfon, mab Richard Jones, a oedd yn frawd i'r [Parch. John Jones](#), Talsarn. Ymfudodd y teulu i U.D.A. yn Awst 1845 a chafodd y mab ychydig fisoedd o ysgol yn Cambria, Wisconsin. Bu'n gweithio ar fferm ei dad hyd nes y prentisiwyd ef, yn 1852, gydag arch-adeiladydd yn Racine, Wisconsin. Wedi iddo fod gyda ffyrniau yn S. Paul a Chicago agorodd fusnes drosto'i hun yn 1873, gan ymneilltuo yn 1887. Bu farw yn 1916.

Dechreuodd farddoni yn 1858 a chyhoeddwyd llawer o'i waith yn *Y Drych* (Utica). Yr oedd dylanwad syniadau Charles Darwin yn drwm ar ei ganiadau, ac felly yr oeddent yn annerbyniol gan lawer yng Nghymru ac yn U.D.A. - e.e., pan ymddangosodd *Yr Ymchwil am y Goleuni* (Dolwyddelan, 1910), geiriau [Spinther James](#) oedd 'Glafoerion Anffyddiaeth.' Yn y cyfamser yr oedd yr awdur wedi cyhoeddi *Hanes Bywyd yr 'Hen Sion Llwyd'* (Cambria, Wisconsin, 1897), ac ymddangosodd 'Rhiangerdd Mona'r Gelli' (buddugol yn eisteddfod Cambria, Wisconsin) yn *Y Drych*, 30 Gorffennaf a 6 Awst 1903, a chân, 'Yr Ysgrwd yn y Gilgell,' yn *Y Drych*, 24 Gorffennaf 1902.

Awdur

Robert (Bob) Owen, (1885 - 1962)

Ffynonellau

The Cambrian, 1903, 125-7

Y Brython (Lerpwl), 16 Tachwedd 1911

T. Gwynn Jones, *Llenyddiaeth Gymraeg, y bedwaredd ganrif ar bymtheg llawlyfr at wasanaeth darllenwyr* (Caernarfon 1920), 1920

Y Drych, 7 Mai 1903

Darllen Pellach

Erthygl Wicipedia: [David Richard Jones](#)

Dolenni Ychwanegol

Wikidata: [Q20567243](#)

Dyddiad cyhoeddi: 1953

Hawlfraint Erthygl: <http://rightsstatements.org/page/InC/1.0/> 

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.